



DEO OPTIM. MAX.  
UNI ET TRINO,



VIRGINI DEI-PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,  
*manè discutienda, in Scholis Medicorum, die Mercurii quintâ mensis  
Decembris, anno Domini M. DCC. LXIV.*

JOANNE-BAPTISTA-ALEXANDRO MAIGRET,  
Doctore Medico, Præside.

*An Spiritus animalis, ut & Sanguis, motu gaudeat circulatorio?*

I.



PIRITUS animalis, mobilissimum illud vitæ pabulum, ignis æthereâ domo subductus, quo præsentè, motum sensumque novit materies (a), quo absente, jacet iners, pondus inutile, corporea moles, quo adulterato, omnia in cœconomiâ animali susdeque miscentur, pessumdatùr functionum ordo, vitæque flammula serè extincta in auras avolare jam properat, quo stagnante artûbus ingruit

(a) Ne cuilibet calumniandi prurigo contingat, libentè hic Profiteor, à me haberi spiritum animale, veluti medium junctionis, cujus ope summo rerum Conditori placuit, corpus inter & animam, commercium instituerè.

A

lethalis torpor ; ferali gelu quasi suspensa sanguinis circulatio sufflaminatur ; pariesque rore benefico defraudatæ contabescunt : Spiritus, inquam, animalis, cujus dignitatem, ambizioso verborum fastu commendare supervacaneum, est fluidum adeo eximiâ tenuitate præditum, ut oculos exquisitissimi microscopii acie instructos fallat ; circa naturam hujûsce spiritûs versari altioris indaginis est. Etenim idem de latice nerveo, quod & olim de mercurio memorandum, scilicet ab illo nunquam post sexcenta experimentorum tormenta potuisse extorqueri confessionem principiorum quibus coalescit. Siquid tamen medias inter nubes jaculari liceret, ad scopum fortasse collimarem, si pro analogiâ lymphæ nerveæ (b) cum spiritu rectore plantarum, strenue militarem : & reipsâ nonne provida parens Natura, quæ vegetabilia ad id finxisse videtur, ut prostarent tanquam organa nutritiæ, quâ commeatum ducimus, materiæ elaborationi famulantia, provida, inquam, parens natura præluderet, in iisdem quasi officinis, circa spirituum animalium genefim : Cur enim dùm vere novo fragrantès agri odoriferâ plantarum silvâ luxuriant, dùm spiritus rectore è telluris sinu emissis conditur aër, senio fracti reviviscunt, aureum adolescentiæ limen veluti de novo salutantes ? Morbo exhausti, paucis diebus ad Athleticum sanitatis robur incantamento quodam revocantur ? Cur spiritus rector, licet corpus suprà compositum, id habet similitudinis, cum lymphâ nerveâ, quod mirâ subtilitate lynceis oculis sit impervius ? Cur tandem sâlia alkali volatilia mixtionem valent aggredi spiritus rectoris, ut & lymphæ nerveæ, quod solemne est in morbis à putridò oriundis : Dùm analogiæ laticis nervei cum spiritu rectore partes amplector, nequis creda me toto cælo abesse à sententiâ eorum qui materiam electricam in nervis hospitare sublimi ore crepant : ut etenim parvum duntaxat discrimen esse materiam electricam inter & phosphorum, probant proditor alliæ odor, aliæque phænomena, ita inter phosphorum qui emergit è combinatione acidi animalis cum phlogistico, & spiritum rectorem qui oritur ex unione acidi volatilis cum parte tenuissimâ olei essentialis, quoddam cognitionis vinculum, intercedere potest : undè concludere fas esset spiritum animale, cujus affinitas cum spiritu rectore quibusdam fulta est experimentis, à phosphoro, ab electricâ materiâ in eo fortasse discrepare, quòd diversæ sint eorundem principiorum constitutivorum, aut proportio, aut combinatio ; sed his supersedere monet instituta propositi ratio, devenimusque ad organa spiritum animale devehentia, nervos scilicet, lora illa quibus mediantibus anima, ut aiunt, cerebro tanquam folio insidens, passionum æstus dirigit, excitat, componit ; nervi qui seu in cranio oriundi à medullâ oblongatâ, seu ex vertebrarum internodiis prodeuntes à medullâ spinali natales fortiuntur, sunt filamenta rotunda, albicantia, textus compactioris, variis hinc & illinc disse-

(b) Vide in æternum colendissimi Magistri PETIT prælectiones Physiologicas, quibus robur, & gratia pereunt, dum manibus nostris contactari se sument,

minatis interpolata nodulis quos gangliones vocant, miris plexibus diversis in locis sibi inosculantia; filamenta illa, ut cultro anatomico patet, sunt congeries seu fasciculus plurium canaliculorum subeodem involucrio comprehensorum, qui partes quibus prospiciunt spiritu animali irrorant; nullus, modo sanæ mentis, inficias iverit, hanc provinciam contigisse nervis, ut rorem vivificum ad partes devehant, cum ligato nervo pereant motus sensusque partis infra ligaturam positæ, sublatâ vero ligaturâ, solita nervus obeat munia; sed quando, mediantibus nervis, ad varia organa delati fuerunt spiritus animales, quodnam iter instituunt? quorsum abeunt? Sunt qui existiment spiritus aut in communem sanguinis alveum refundi, aut in auras vanescere, quibus poris vasivæ id fiat assignare parùm solliciti; nos verò contendimus naturam eundem tenorem sequi semper solitam, easdem spiritibus, ut & sanguini posuisse circulationis leges, laticemque nerveum ope arteriarum nervosarum ad partes devectum, ab his per venas nervosas versus cerebrum, medullamque spinalem gradum remeare. Huicæ ideæ favet dissectio nervorum in plures abeuntium ramulos, quorum, nullo prorsus dubio, alii arteriarum, alii venarum vices gerunt; & quandoquidem non tantisper præluceret fax Anatomica, non minùs Physicæ certitudinis laudem sibi vindicaret spirituum circulatio, quâ ablata spiritus animales primigeniam servare Naturam nequeunt, corpus ejusdemque vires perstare non possunt, nec varia sensationum phænomena ullo modo explicari.

# I I.

**P**ROVIDE à Naturâ sancitum est, ut omnia corporis humani fluida certis motuum legibus subjicerentur; quandò enim quieti committuntur, variæ quibus constant moleculæ, motu quodam intestino agitæ, in sese ruunt, repetitis undique collisionibus, solvitur fluidorum compages, principia constitutiva sui juris facta, in sese agunt & reagent, postque varias confricationes nova emergunt connubia, novæ mixtiones, evolviturque principium illud alkali volatile dictum, diras movens in corpore tragædus; ut præcaveretur spontanea illa fluidorum degeneratio, instituitur motus circulatorius cujus efficacia eò major, quò liquidi indoles ad putredinem proclivior; si enim sanguis quo nullum ferè aliud fluidum propius ad humanitatis characterem accedit, præcipiti non rapiatur gressu, tacitoque illapsu vasa, ut ita dicam, lambat, brevi faciscit in fecdam putrilaginem; lymphæ verò, licèt minor sit vis impellens; non tam cito alkalînâ labe inficitur, eo quod ab indole corporis humani magis recedat, sed si vergat ad putredinem, quod obiter notandum, causticitatem nulli secundam atquirat, ut luculenter apparet in cancro; quæ fors sanguini, quæ lymphæ stagnantibus contingit, eadem manet spiritus animales, quando in vasorum mæandris torpentes, motu circulatorio non quatiuntur: tunc à nativâ indole degeneres, mutantur in lympham inertem, vap-

pidam ; muniis obœundis omninò imparem : at inquiet aliquis , latèx nervèus constat principiis tam valido nexu cohærentibus , ut disjungi nequeant ; si res ita sese habeat solvatur illarum quæstionum nodus. Cur vapor carbonum tam rapido istu vitam perimit ? Nonne apud omnes Chemicos in confesso est , phlogisticum quo prægnant carbones accensi , vasa corporis permeare , commixtumque spiritibus varia quibus ipsi constantur principia brevi divellere , ni celeriter infringantur illius ut ita dicam , aculei , mediante vapore aceti , cujus societatem inire amat. Cur narcotica naribus duntaxat admota , somnos eheu ! nimium fugaces , valent arcessere ? Nonne uno ore fatentur Medici , vim narcoticorum in eo potissimum consistere , quod eorum pars volatilis virosam quid redolens , laticem nerveum impetat , mutationeque hinc ortâ , talis spiritibus concilietur lentor , ut testitudineo gressu circulum vix conficiant ? Cur in se bribus malignæ profapiæ , dum pulsus , lingua , urinæ , à naturali statu parùm discedunt , tantum periculi portenditur ? Nonne ex ingenti illâ virium prostratione , ex illo fugaci delirio , ex subfultu illo tendinum , ex diris quibus laborant ægri convulsionibus , luce clariùs patet spirituum crassim adeò depravari , ut brevi fatisceret humana compages , ni adhibitâ omnium anti-putridorum supellectile , ruenti machinæ futura apponeretur : dum truculentèr debacchatur pestis , luctum mortemque triste satellitium undique circumferens , corruunt in plateis veluti fulmine percussi homines , qui priusquam venis lethale venenum combiberent , optimâ fruebantur valetudine : qui fieret ut intra spatium aliquot secundarum , nullâ functionum læsione prægressâ , mortis præda evaderent isti homines , ni miasmata putrida per aërem volitantia spiritus animalis energiam illicò destruerent ? his observatis evidenter elucescit posse corrumpi spiritus animales , moreque aliorum fluidorum spontaneum fermentationismotum experturos , si intra vasorum claustra , nullo exerciti motu remanerent ; aliunde si per somnum , aut dum corpus otio vacat , immoti starent spiritus , nonne volatilis eorum pars avolaret subsidente crassiore , crassamentumque illud ductibus nervosis inhærens , his orba-retur dotibus ad motûs sensûsque munia requisitis.

### I I I.

QUANQUAM sanguis motu gaudeat circulatorio , varias tamen , dum it reditque patitur jacturas ; etenim viscera secretionibus dicata , huic præter-fluenti singulis momentis quid furripiunt ut suo vacent muneri : hinc evenit ut sanguis qui dum è cavo cordis postico propellitur , pleno superbit flumine : dum gradum revocat , innumerarum secretionum dispendio exhaustus , anticum cordis thalamum ingloriùs repetat , fonsque ille omnium humorum brevi exaresceret , ni chilli appulsu reficeretur : non aliter judicandum est de spiritibus dum circulationis vias iterùm atque iterùm relegunt ; etenim in varia humorum incernicula , uberius

5  
affluunt secreto liquori enèrgiam suffecturi ; nonne v. g. glandulæ salivales, aliundè parùm sensibiles , majori gaudent nervorum proventu , quàm innumeræ aliæ partes ; si ad exquisitiorem glandularum sensum non conferat huc advecta spirituum animalium copia , jure concluditur illos salivæ immisceri. Aliundè nullum adest dubium quin per vitæ actuositatem detr. ahanur subtilissimæ quædam laticis nervei moleculæ ; quæ spirituum damna ut resarcirentur , indulta est homini nocturna quies ; dùm enim per alta somni silentia minuitur secretionum quantitas , dùm solvitur lacertosum genus , dùm in cerebro multùm sanguinis coacervatur , secretioque eo copiosior evadit , quò ad organum secretorium major appellit sanguinis quantitas , facili de negotio fit , ut quæ perierat fluidi nervei summa , magno scœnore rependatur. His legibus stat œconomia animalis ; sed si denegaretur prædictus ille circulationis motus , spiritusque animales , quâ proportionè è cerebro ad partes deferuntur , per cutis foraminula diffarent , cùm secretoria cerebri moles tantis sumptibus impar evaderet , corpus intrâ spatium aliquot horarum diffuens , in tenues auras dilaberetur. Intuere operarios qui solido die ôperi incumbant , motibusque continuis sese exagitant ; nùm fingis animo homines istos , si fieret limphæ nerveæ jugis extra cutis porulos effluxus , viribus ferè illæsis , tantum sustenturos diuturni laboris pondus , hosque dùm vespèrè domum redeunt , dulcia uxoris dividentes oscula , luctam venèream strenuè aggressuros : sunt in plagis orientalibus homines qui uno die quinquaginta leucas efficiunt ; quantum ad perennandos istos motus , quantum laticis nervei in villos fibrarum muscularium derivati per auras disperderetur ? Quandò enim progredimur , omnes ferè muscoli suam conferunt symbolam ; corpus humanum veluti malus est quem hinc atque illinc alligatum continent varii funiculorum ordines ; dùm corpus stat , librat is undiquè viribus , in unum ità conspirant muscoli funium vicem gerentes , ut malus , id est ossium compages , ad punctum equilibrii componatur ; dùm verò motibus exercetur machina , oppositæ funiculorum series mirâ seu tensionis , seu relaxationis alternatione mutuas sibi scœnerantur operas , quibus præcavetur nutationis periculum ; sed dùm in his peragendis motibus tam innumera requiruntur organa , judicare est quantæ fieri debeant spirituum jacturæ , quas brevi tempore non resarciet cerebrum , cùm sanguinis ad primarium istud viscus delati velocitas serpentinis vasorum flexibus , ita imminuta sit , secretioque fiat juxta rationem directam velocitatis fluidi ad organum secretorium appellentis ; aliundè hic per transfennam notare expedit in quibusdam animantibus cerebrum in molem lapideam concrevisse , illibatis tamen functionibus , nùm denegato spirituum circuitu intèlligeretur , quî medulla oblongata , medulla spinalis , vicariam cerebro opem substituisserit.



**F**IDOS homini satellites natura concessit, sensus scilicet, quorum ministerio doloris, voluptatisve nuncius illicò desertur ad animam, vires suas tunc recolligentem, seu ut arceatur malum imminens, seu ut foveatur adblandiens voluptatis aurâ. Pender à circuitu spirituum animalium mechanismus ille quo sensus exploratorum vicem gerentes, ad sensorium commune delineatas objectorum externorum imagines transmittunt : undas sulcavere Physiologi, quandò arteriis nervosis duntaxat admisissis, in explicando sensationum negotio immorati fuerunt. Etenim juxta opinionem hanc, oporteret ut, dùm sensatio peragitur, tota laticis nervi columella, refluïs veluti undis, in cerebrum arietaret, quod insolubilibus premitur difficultatibus : è contrâ si spiritus in rotam cogi constet, nullas explicanti necit moras sensationum dilucidatio, siquidem, ad motum vel levissimum, instructa spirituum redeuntium acies ad sensorium commune, velut ad vexillum celeri cursu properabit : magnus erit mihi Apollo qui absque influxu refluxuque lymphæ nervæ, varia generis nervosi sympathiarum phenomena enucleare sataget ; & reipsâ cur sympathia à nervis, non easdem agnosceret leges quas sympathia à valis sanguiferis ? nonne duo viscera quæ propter vasorum sanguiferorum communionem, inter se consentiunt, mutuâ functionum alacritate vigent, quandò in utroque ritè ordinatur circulationis rithmus, si ve. è in uno à normâ aberreret rithmus iste, mutuâ læsione condolent ? non aliter, quando duas inter partes, amicâ nervorum conspiratione, commercium instituitur, intelligendum est motus sympathicos ab aliâ causâ oriri, quàm ab institutâ spirituum circulatione, quæ in variis tùm animi, tùm corporis affectibus, novos velocitatis gradus adipiscitur, novas directionum experitur mutationes. Si dubii quædam nubecula adhuc oculos offenderet, si quibusdam minimè arideret doctrinæ istius novitas, assensum vi quâdam raperent morbi cujusdam phenomena nullo alio modo explananda. In morbo illo qui catalepsis audit, ægrotans absque ullo sensu immotus manet, eundem corporis statum retinens quem habebat momento dùm corripiebatur : tres gradus in catochò observat clarissimus hujusce Scholæ magister *Peut.* Primo gradu qui extasis dicitur, artus redeunt illicò ad statum à quo dimovebantur, & adest memoria rerum quæ paroxismi tempore geruntur ; secundo qui catalepsis perfecta vocatur, æger statuat instar obrigescens, in eodem jacet situ quem habebat dùm morbus ingrueret, oculis apertis, ore hiulco, omnis sensus adeò expers, ut acu punctus nullum doloris signum exhibeat, si brachia eleventur, flectantur digiti, in eadem positurâ constanter permanent ; tertio gradu qui catalepsis imperfecta, super sunt quædam sensus vestigia, adest artuum immobilitas, sed si à statu quem obtinet deturbetur membrum quoddam, sensim sine sensu ad pristinum redit locum ;

hujusce morbi indolem sedulo perpendenti patet catalepsim, nihil aliud esse quam cerebri, ut ita dicam, *syncopen*, & à strictione nervosi systematis tum arteriosi, tum venosi, ortum ducere miram symptomatum congeriem; etenim si strictione eum attigerit gradum, ut spiritibus in cerebro feriantibus præcludatur iter per oscula arteriarum nervosarum, reduxque è partibus limpha nervea per venas nervosas in cerebri alveum refundi nequeat, facile elucescit cur motus qui ab influxu pendet, cur sensus qui à refluxu, deficiant. Partes rigide eundem statum retinent: cum organis eadem adhæreat spirituum animalium dolis, non intelligerem cur à situ desisterentur; membrum quodlibet cereum in varios flecti situs, in quolibet positurâ permanet: nec mirum, supponatur enim musculos brachii extensores contrahi, flectere si volueris, fibra extensorum elongabitur, ex illâ elongatione quid quæso eveniet? Nonne ex vesiculis quibus coalescunt fibræ musculares, protrudetur spiritus animalis qui, cum aditus per venas denegetur, mediantibus vasis collateralibus, in musculos antagonistas defluet, ibique quiescet, donec à causâ externâ denuò in motum cieatur; postquam duæ aut tres effluxerunt horæ, functiones quasi sopitæ resurgunt: per omnè paroxysmi tempus spiritus animalis in encephali fabricâ secretus, certâ copiâ coacervatur, pondere, motu allidit ad oppositum obicem, victor tandem, diffringit repagula, & nova veluti vitæ germina cunctis diffundit partibus; si vasa arteriosa duntaxat invaserit strictione, ut in extasi, poteris quidem flectere brachium, sed flexum semel, indocile erit alias pati posituras, eo quod versus cerebrum per venas liberè remeaverint spiritus: Nonne ex his concludere liceret, eos qui olim pro sanguinis circulo acriter dimicabant, priusquam Harveianis demonstraretur experimentis circulus iste, opinioni adhiæsisse, argumentis fultos debilioribus, iis quæ pro stabiliendâ fluidi nervei circulatione, in medium adduximus. (a)

V.

**E**A est cognitionum humanarum conditio, ut multis impeditæ salebris, nusquam valeant lucem affundere tam vividam, quæ dubiis hinc & illinc obscurari sæ tantisper non sinat; ita doctrinam circulationis spirituum extrâ omnes objectionum aleas ponendam non existimamus, varia jam premunt argumenta: si daretur laticis nervei circuitus, cavum quoddam in nervis deregeretur, nervi nodo constricti super vinculum tumescerent. Sed plantæ constant canaliculis quorum ope è telluris sinu exfugitur succus nutritioni inserviens, si caulibus

(a) Si clarissimi hujusce Scholæ magistri *Bertin* dissertationem, de spirituum circuitu Regiæ Scientiarum Academiæ, anno proxime elapso communicatam, perlegere datum fuisset, novis prosectò illustrata argumentis majus acquisivisset robur Thesis nostra, quæ hodie rerum copiâ ditior cessisset, si tenaci pollerem memoriâ, cum illustrissimum *Peit*, qui plurimis ab hinc annis doctrinam istius circulationis proficitur, in Physiologiâ fuscâ hæc de re, dissentientem, audire felicitas mihi contigerit.

plantarum injiciatur ligaturâ, citrà ullum tumorem marcescunt. Aliundè ex eo quòd cavitas nervorum oculi aciem fugiat, non concludere licet cavitatem illam merè commentitiam; nonne latebat veteres ductus deferentis cavum. Si suprà vinculum, nervus ligatus non intumescat, illud fortasse ex eo potest contingere; quòd fiat refluxus à ramulo impedito in truncum ubi nullus ponitur obex; sed instabit aliquis, ut peragatur circulatio, necesse est ut adsint vasa quæ ad partes ferant, vasa quæ ex partibus devehant. Jam diximus nervos nihil aliud esse quàm fasciculos plurium vasculorum diversi generis; quid? an natura sub eâdem vaginâ tùm arterias, tùm venas recondidit? Cur res ita sese non haberet? in cæteris corporis partibus tubuli limphatici, tùm arteriosi, tùm venosi, propagines vasorum sanguiferorum comitantur; nonne Natura voluit, vasa tùm sanguinea, tùm limphatica, tùm nervosa quæ testiculum adeunt, uno comprehendi involucro: si igitur facilè revelli queant tela quibus oppugnatur spirituum circulatio, si aliundè circuli necessitas ex allegatis rationum momentis evidentèr pateat, quid moror conclusioni adstipulari?

*Ergò Spiritus animalis, ut & Sanguis, motu gaudet circulatorio.*

## DOMINI DOCTORES DISPUTATURI.

M. Ludovicus - Petrus - Felix-  
Renatus LE THIEULLIER,  
Regis Consiliarius, & in  
Majori - Consilio, necnon in  
Magnâ Regiæ Domûs &  
Franciæ Præfeturâ Medicus  
ordinarius.

M. Petrus - Ludovicus - Maria  
MALOET, Consiliarius  
Medicus Regis ordinarius in  
Supremo Senatu Parisiensi  
designatus.

M. Alexander - Dionysius  
DIENERT.

M. Carolus GEILLE de Saint-  
Leger.

M. Antonius GARNIER.

M. Jacobus - Ludovicus  
ALLEAUME, Militarium  
Nosocomiorum ad Regis Exer-  
citum nuper Medicus.

M. Gedeon DERABOURS;

M. Guido-Andreas GARNIER,  
in Insulis Martinicâ & Gua-  
daluppiâ, Consiliarius Regis  
Medicus ordinarius.

M. Laurentius FERRET, Ec-  
clesiæ Cameracensis Canonicus.

Proponebat Parisiis PAULUS - GABRIEL LEPREUX, Parisinus;  
saluberrimæ Facultatis Medicinæ Parisiensis Baccalaureus, Theseos Auctor.  
A. R. S. H. 1764. A SEXTA AD MERIDIEM.

---

Typis F. A. QUILLAU, Universitatis & Facultatis Medicinæ Typographi. 1764.